

Visoki predstavnik se pridružio predstavnicima BiH vlasti u Kostajnici

Visoki predstavnik Paddy Ashdown je zajedno sa predsjedavajućim Vijeća ministara Adnanom Terzićem u četvrtak posjetio Kostajnicu blizu Konjica, gdje su tri člana porodice Anđelić ubijena na Badnje večer.

Guverner Hercegovačko-neretvanskog kantona Dragan Vrankić i ostali visoki zvaničnici kantona su se pridružili visokom predstavniku i predsjedavajućem Vijeća ministara u izražavanju saučešća ožalošćenim članovima porodice.

Visoki predstavnik i predsjedavajući Vijeća ministara su obavješteni o toku istražnih radnji koje policija poduzima u vezi sa ubistvima, te su u bolnici u Konjicu posjetili gosp. Marinka Anđelića, koji je teško ranjen u napadu.

Govoreći u porodičnom domu Anđelićevih, u kojem su ubistva počinjena, visoki predstavnik je izjavio: "Bezrezervno, u ime međunarodne zajednice, osuđujem ovaj užasni i neljudski čin. Pridružujem se svojim partnerima iz BiH u izražavanju najiskrenijeg saučešća svim članovima porodice i prijateljima. Brzo djelovanje policije u poduzimanju istražnih radnji u vezi sa ovim zločinom treba građanima uliti povjerenje u organe vlasti."

"Međunarodna zajednica će obezbjediti bilo kakvu vrstu pomoći ako ona bude neophodna. Obavezni smo osigurati da ovakva djela ne prođu nekažnjeno. Istraga spada u nadležnost policije, ne međunarodne zajednice, međutim mi smo spremni pružiti pomoć. Naš prioritet je da osiguramo da građani ove zemlje žive u miru, te da se ne zaustavi proces povratka."